

# JA MYĪMAJTSKPI NØKY MIDI JA PABLO TYANĪGAJX JA TIMOTEO

Ku ja Pablo ojts tnijayi ja Timoteo

**1** Pablo øts, jøts øts ja nwindson'ajtim Jesucristo ngudanaapy, øts xkajxp ja Dios Teety sam øts ja tø xamidsøky jøts øts ja yja' ndukmado'ot ja naxwii'ñit jaa'y sa nbaajtint ja øy'ajtin xemikøjxp ku ja Jesucristo møøt n'ejtint. <sup>2</sup>Mets Timoteo ya'at nøky ndanija'ayip. Mjagyajpnipxi mets ja janchja'win, jade'en'ampyts myik'u'nktijy myik'u'nkjawi. Ja Dios Teety mgunuu'kxip møøt ja nwindson'ajtim Jesucristo. Ja' mmo'ojip ja pya'ayo'owin, ja' mmo'ojip ja yjotkujk'ajtin.

Sa ja Timoteo tyiknigaxø'økt ja Cristo ja yja'

<sup>3</sup>Ndamøja'wip øts ja Dios ku me nni'amidoo'wi y'lity jøpy ux. Ja' øts idø'on ja yja' nbadumpy samdam ja t'øyjawi sam nayide'en ja møjaa'dyøjk y'lity ttundi.

<sup>4</sup>Nja'myejchp øts sa myaajxy ku nnawya'kxyim. Wamp øts o me ma njanch'ejxpaatt jøts njotkujk'att.

<sup>5</sup>Nja'myejchp øts nayide'en sam ja Dios Teety xjanchjawī. Jabi jawyeenxi ja mdigamøj jøts ja

mdaak nayide'en tyiktundøø ja yjanchja'win.

<sup>6</sup>Paty mets icyam ndukja'myech jøts øy tsuj xyikmiwenit ja mdunkjøøjp midi ja Dios tø mdanipiky ku mets ojts ngønixajy.

<sup>7</sup>Ka'ap ja Dios Espiritu Santo tø tpikta'aky jøts øy ti ngudsø'jka'ant. Nayi Espiritu Santo ja myøk'ajtin xmø'øyimp jøts amumjoojt ndu'unint jøts ja tsojkin jøts ja øyja'gyukin nmøøt'ajtin.

<sup>8</sup>Ka' ti xtsø'ødyunjawit sam ja Dios yja' xkajpxwa'kxi, jøts ni øts xkatsø'ødyunjawit ku øts nay ja' nyiktagudsumi. Kupøk o myikjemduñ myikteduñ myikjemnøjmi myiktenøjmi ku tka'øyjawidi ja Dios kyajpxy midi xyiknitso'ok'ajtimp. Jade'en xmīdanit sam ja Dios ja myøk'ajtin tyaky. <sup>9</sup>Jade'en ja Dios ttsøky jøts ja xyiknitso'ok'ajtin jøts nayide'en amumjoojt nnadyamiyojxint. Kidi ja'agøjxpip adøm ja xtsøjkyim ku adøm n'øyjaa'y'ajtyim nga'øyjaa'y'ajtyim. Ma windiixyip adøm ja Dios jade'en xamidsøjkyim, ka'anīm wyinaty ja naxwii'ñit cho'onda'aky. Ja nwindson'ajtim Jesús køjxp adøm ja nitso'ok'ajtin

nbaajtint ku mōōt n'ejtint. <sup>10</sup>Tō ja Dios Teety tnankyja'ljxyi sa ja pa'ayo'owin tjagyepy adōmgōjxp ku ja nwindson'ajtim Jesucristo xaniguejxyim. Sa ja y'ō'jky jōts yjujkpyijky, nayide'ents adōm nbaajtint sam ja tō tnajstuni. Jade'ents Cristo kōjxp ja o'jkin xka'ukmimajadaajkna'ant jōts xemikōjxp ja jujky'ajtin nbaajtint ku ja y'ayuujk tnitanaay sam ja wyinaty tō ttanibiktaagi.

<sup>11</sup>Dios ø tō xpikta'aky jōts øts ya'at ja kyajpxy ja y'ayuujk ngajpxwa'kxit jōts øts yō ngudanit, jōts ø nduk'ixpōkt pōn ka'israelit jaa'dyi. <sup>12</sup>Paty øts ixyam øy ti ngu'ayo'ombaadi. Ka'ap ø ti ndsø'odyunjawi, pō Diosxi øts ja yja' nbaduujnip. Wampts øts jōts øts ja Dios xpōkjō'knit kunim ja tiidyu'unin xōōw mye'ent.

<sup>13</sup>Mets Timoteo, sam ø tō nnajstuni, tu'ugyi ja øy ixpōjkin jade'en xyikyø'øty, ja Dios yja'. Jade'ents ja Dios xjanchjawit jōts ja mmigu'uktōjk xpa'ayo'ot xminamyayit nayide'en sam ja nwindson'ajtim Jesucristo xamidsōjkyim ku mōōt n'ijtyim. <sup>14</sup>Ja Espíritu Santo midit adōm nmōōt'ajtyindip, ja' pyudōjkingōjxp xpadun'ett ja Dios yja' midit tō mdanipikyiyi.

<sup>15</sup>Tōxi me xnijawi sam øts ja Asiit jaa'y xmajstuttōō, ja Figelo mōōt ja Hermógenes paat. <sup>16</sup>Diosts ja kunuu'kxiyip ja Onesíforo mōōt ja myigu'uktōjkti ku øts ja kawinaak ojk xnimiñ jōts ø xpudōki. Ka'ap ja tsø'odyu'unin tjagyepy øy ø njatsumy'ity. <sup>17</sup>Ne'egi øts ja x'ixaay ya Roma ku øts ja mā xka'ljxy

kunim øts ja xpaajty. <sup>18</sup>Wan ja Dios ja pya'ayo'ajtin tmø'øy ku ja tiidyu'unin xōōw tpaatt. Wa'atsxi me xnijawi sa ojts xpudōjka'am jam Efeso kajpjotp.

### Sa Timoteo mōk tmidanit ja ayo'on Jesucristo kōjxp

**2** Mets u'nk Timoteo, jotmōkpōk, yiktun ja mōk'ajtin midit ja nwindson'ajtim Jesús yajkpy. <sup>2</sup>Ja ixpōjkin midit m'ijxpy midit mnija'wip sam øts ja mayjaal'y nyik'ixpiky, ja'ats nayide'en mdanipōkp pōn øy tsuj jaa'y'ajtp, midit øy tsuj yik'ixpōjqp nayide'en.

<sup>3</sup>Mōk xmidanit ja ayo'on midit mbatpy ku ja nwindson'ajtim Jesucristo yja' xpaduujni. Mōk nabyikta'agi jade'en sam pōn yikexy tseptumbi. <sup>4</sup>Ka'axi mibaat ja tseptumbi pyaat'atyit jōts nugo ajawi o ti ttatōkit. Tu'ugyi ja yja' tyikyø'ødyit sa ja wyindsøn ja y'ane'emyidi. <sup>5</sup>Nayide'en ja kuyajtpi, tu'ugyi ja yja' ja ttu'undit sa ja tō yik'ana'amdi, winets ja tōktit ja ñiguyaty. <sup>6</sup>Nayide'ents ja kamdumbi nayja' paat'ajtiyip kō'om tōkjō'ōkt ja pyikta'aky. <sup>7</sup>Pawinmaajyik øts yō n'ayuujk, nayi nwindson'ajtimts mbudōkiyip jōts xja'gyukit.

<sup>8</sup>Ja'myats ja nwindson'ajtim Jesucristo sa ojts yjujkpyiky jap oo'kpi jutjōtpy midit ja rey David y'ap'ajtpy. Yø' øts ja yja' ngajpxwa'kxiyip sa ja øy'ajtin xukpaajtant. <sup>9</sup>Yø' kajpxwa'kxingōjxp øts øy nyikmi'ekyi, mōkts øts yō nwindani, jade'ents ø nyik'ixy ejxim tu'uk ja mōj tundigōōbya'an; øy øts njayiktsumy ka'ap ja Dios

kyajpxy jaayi tyañ. <sup>10</sup>Ja'agøjxp øts yø ayo'on møk nwindani jøts ñitso'ok'attit pøn ja Dios tø wy'i'ijxyi jøts tpaattit ja øy'ajtin midi xemikøjxp xmø'øyimp ja nwindson'ajtim Jesús.

<sup>11</sup>Janch tiy'ajtin yø':

Ku ja Cristo møøt nayide'en n'ø'jkyim, nayide'ents ja møøt njuky'ajtant;

<sup>12</sup>pøni ngu'ayo'ombaajta'am ja yja', xmø'øyimpts ja' ja y'øy'ajtin ma ttanitanani ja yjaa'y.

Pøni ka' ja ngupijkyim, nayide'ents ja xkagupøjkint.

<sup>13</sup>Pøni ngamøk'ajtingøjxp adøm ja njanchja'win kyamajadaajkyim, jade'eñim ja Dios tyikyø'øy ja yuyj'ajtin jøts ja pudøjkin ja xmø'øyim, ka'ap ja Dios mibaat ñay'ixmajtsiyit kø'øm, paty ja xkaja'dyigø'øyim.

**Yikyø'øpy jade'en ja Timoteo sa tø yiktanipiky**

<sup>14</sup>Mets Timoteo, tukja'myats pøn jaty ja Dios yja' tjanchja'widip jøts kidi nugo kyajpxjimbetti kyajpx'adøjti, kidi nugo tkajpxyøndi midi ka' tyuñ; ñanktyuu'tigøjyidip yø jade'en.

<sup>15</sup>Amumjoojt nabyikta'agi sa ja Dios yja' xpaduujnit jøts øy tsuj yø mdunk pyidsø'omt Dios wyingujkp. Ka' ti nugo xtsø'ødyunjawit ku ja tiy janch xkajpxwa'kxi ja Dios tyiy'ajtin.

<sup>16</sup>Kidi xpabiky yø'øbi ayuujk pøn jam nugo o sa kajpxtip. Pøn jade'en ttundip, ja kya'øyjaa'y'ajtin idø'øn ja yikmiwenidip. <sup>17</sup>Pøn

jade'en nugo kajpxtip, jade'ents ja kya'øy'ixpøjkin ja myøjidi myayidi jøts ja windigø'øyin nugo tyiknaxkida'akti. Jade'en y'adø'øtsti ja Himeneo jøts ja Fileto, <sup>18</sup>ku kø'øm tø ñanktyuu'tigøyidi jøts ja wya'andi ku ka' y'uk'ejtnit ja jujkpyøjkin ku ja o'jkin nbaajtant ya naxwiñ. Jade'ents ja myigu'uk winaagin tø ttukmajststuttu ja yjanchja'win. <sup>19</sup>Ka'ap mibaat pøn tyiktigatst ja Dios wyinmaa'ñ, jabi yide'enxi jaabyety y'ity: "Wa'ats ja Dios Teety ja t'ixy tñijawi pøn padu'unxip ja yja'"; jøts nayide'en wya'añ: "Wan tmajstutnidi ja ka'øybi, pøn ja Cristo yja'ajtpy."

<sup>20</sup>Jade'en n'ukpiktaajkint ku jaa'y xnime'lenint xnija'jtint njønnotp ndøjkjotp, jøts nduktajø'kxa'ant ja' midi øy midi tsuj midi tsobatp; jøts ja' midi ka' chobaaty, ja'ats o pøn tyiktu'ump. <sup>21</sup>Nayide'ents idø'øn adøm, ku øy tsuj nnay'ejx'ejtindit jøts nja' nayide'en chobaajtant Dios wyingujkp; jade'en'ampyts idø'øn ja xyiktu'unint jøts nmigu'uktøjk nbudøjka'ant.

<sup>22</sup>Majststut yø una'jk winmaa'ñ midi ka' tyuñ. Tu'ugyi xyikyø'øty ja tiy'ajtin jøts ja mjanchja'win, jøts xminamyayit ja mmigu'uktøjk øy tsuj pøn tu'ugyi t'ajot'ajtp ja Dios. <sup>23</sup>Nnimaapyts mets jøts ka' xpadøkit yø'øbi ayuujk midi katump. Mnija'wip ku jade'en ja tsep nugo yikpaaty. <sup>24</sup>Pøn tpaduujnit ja Dios yja' ka'ap ja nugo ajawi o ti ttatøkit ma ja tsep, ma jaa'y o ti ttundi. Ja' ja tyu'ump øy'ajtin tuda'aky'ajtin øy pøn møøt. Ja y'ixpøjkin ja tyuk'exp tyuknijawip sam ja tuda'aky'ajtin

nayide'en tmøøt'att. <sup>25</sup>Jade'ents ja øy tsuj tkajpxuda'akt pøn ja wenk winmaa'n tmøøt'ajttip mididi ka' tyiyi, wan ja Dios pyudøkiyi jøts tyigatstid ja wyinmaa'n jøts tpadu'undit ja tyiiby yjanchpi. <sup>26</sup>Wan tmajtstu'utti ja miku' yja' ku ja nugo tø wyin'hiñidi jøts ja nugo tø tyuktuñi pøni sa ja ttsøky.

Sa jaa'y wyinatyi ku ja  
tiidyu'unin xøow tpaatwani

**3** Me Timoteo, nayide'en xnijawit ku wyingoni ja xøow ja jumøjt jøts nwindson'ajtim mye'ent, janch tsep ja xøow ja jumøjt ñaxt. <sup>2</sup>Øy sa pøn y'adøøtstid. Kyøøm winmaa'n ja nugo yikmøjtøkiwya'andip, meen ja nugo may choktip, namyikaxi winmaa'n ja nugo yiktu'undip. Tpattit tñaxtit ja Dios, ka'ap ja tyeety ja tyaak twindsøøgidit, niti ja tkamøj'ejxtit tkamøjawidit jøts ni tkawindsøøgidit ja Dios yja'. <sup>3</sup>Ka'ap ja ti tsojkin, ka'ap ja ti øy'ajtin tmøøt'attit. Pagajpxk ja' yø tyunk'attip, ka'ap ja maa'kxujkin tjagyaptit, tyunwandip o ti ttunwa'andit, nugo øy pøn tmidsep'atwa'andi øy wyinatyi pøn tuda'akyjaa'y'aty. <sup>4</sup>Kyøoyakp ja kyøøm migu'uk, adøøtsp o sa y'adøøtst. Kyøøm ja' y'ixa'ap, ka'ap ja Dios yja' ne'egi t'ixaajyit. <sup>5</sup>Ejxingøjxp nadyiyi ja Dios yja' tpaduujnidit pø sa ja y'am yjotp, ka'ap ja tmøjpiktaajkit ja ñitso'ok'ajtin.

Me Timoteo, ka'ap yø jade'embidi jaa'y xunk'att. <sup>6</sup>Adøøtstip o sa y'adøøtsti, tøjik tøjkidip jøts ja tøøxyøjk twin'øøndit pøn

ñadyu'uk'ejxtip pøn y'amutsk'ejxtip. Nayide'ents ja tøøxyøjk, jaa'y'ajtp ja' o sa yjaa'y'aty. Kyupijky ja nugo, <sup>7</sup>ixpøjkin ja jade'en tijy yikmøøpy, nisudso'ampyts ja jade'en tkaja'gyuki ja Dios tyiy'ajtin. <sup>8</sup>Nayide'en sam ja Moisés y'lijty kyayikpaduñ ja yja' sa ja yjawa'añ ku ja kyamibøjkøø ja ximaabyi Janes møøt ja Jambres, nayide'ents yø jade'embidi jaa'y tkamibøjkmidi ja Dios yja'. Tum wenk ja wyinmaa'n yikyø'ødyi, ka'ap ja Dios jade'en kyupikyidi. <sup>9</sup>Ka' nugo ajawi myajada'aktit ja yja', kuwani yiknijawi ku ja myo'tpi winmaa'n nugo tyikmøjtøkiwya'andi. Nayide'ents yjajtmidøø ja namajtskpi mididi twindsøow ja møjaa'y Moisés.

Midi ja Pablo yjaak'uktanipøknip  
ja Timoteo

<sup>10</sup>Mets Timoteo, øy tsuj mets ja n'ixpøjkin xyikyø'øyi. Nayide'en mjaa'y'aty sam ø njaa'y'atyin, tu'ugyi ja mwinmaa'n xyikyø'øy, ja øy'ajtin tuda'aky'ajtin jøts ja janchja'win. Nayide'en mjaty <sup>11</sup>sam njajty sam ngubejtyin. Mnija'wip pøni sa njajty jam kajpjotp mididi yiktejp Antioquia jøts nayide'en jam Iconio møøt ja Listra ku øts ja Dios yja' ngajpxwa'kxi. Jamts øts ja jaa'y xjemduñ xeduñ, jøts øts nwindson'ajtim nja'myejch xjats ø møj xpudøjkiyi'ñ. <sup>12</sup>Janch tiy'ajtin yø', yikjemdu'undip yiktedu'undip pøn ja Cristo yja' nadyamiyoxwajniyip; <sup>13</sup>jøts ja' pøn ja myigu'uk nugo twin'øø'ndip køøm ja ñanktyuu'tigøyidi, nisudso'ampy ja kya'øyidi ja yja'adi

ku nugo jade'en n̄awyin'iiñidi ja xem ja yam.

<sup>14</sup>Mets Timoteo, tu'ugyi mets yø mja' jade'en xyikyø'ty sam tø x'ixpiky sa tø xnijawi. Mnija'wipxi pøn mduk'ejxi pøn mduk'ixpøjki, <sup>15</sup>ku yø mutskyi xnija'wiyii'n̄ yø Dios kyajpxy, midi xyikujajtaajkimp, midi xyiknitso'ok'ajtimp ku njanchja'wa'ant ja nwindson'ajtim Jesucristo. <sup>16</sup>Tu'ugyi ja Dios kyajpxy ja y'ayuujk jade'en y'ity, sa ja tø yikwinmaa'nmyø'ø yø pøn tø tjaadyañ. Nay yø' xuknija'wamp ja tyiiby i ja yjanchpi. Ku ndundigø'øyint ngajpxigø'øyint nay yø'øts xuknija'wimp ku yø pyøkyi. Xmø'øyimpts yø' ja ixpøjkin sa ja øy'ajtin ja tuda'aky'ajtin njagyajpint, <sup>17</sup>jade'en'ampyts ja Dios yja' ka'pxy nnija'wa'ant jøts jade'en ndu'unint tum ja øybi tum ja tsujpi.

**4** Mets ixyam ndanipijkpy Dios Teety wyingujk jøts nayide'en nwindson'ajtim Jesucristo wyingujk midi n̄anky'ejxiyip ja møj windsøn'ajtin pøn tiidyu'ump ja jujkpyi jøts ja øøkpyi, <sup>2</sup>jøts xkajpxwa'kxiyit ja yja'; tu'ugyi jade'en pojyi'iky xpadu'unt wan pøn mgupiky mgagupiky. Ana'am pøn tundigøøpy pøn kajpxigøøpy jøts xukja'gyukit. Jade'ents tuda'aky xuk'ext xuknijawit ja ixpøjkin. <sup>3</sup>Pyaatp ja xøøw ja jumøjt ku ja jaa'y tkawa'andit yø'øbi ixpøjkin; pyikta'aktip ja' kyø'øm yik'ixpøjkpidi pøni sa ja ttsoktit pøni sa ja tmadowa'andit. <sup>4</sup>Yø tyiiby yjanchpi ka'ap yø ttsoktit, ja' yø ne'egi choktip ja kwenti ja madya'aky midi kayikja'gyukip.

<sup>5</sup>Me Timoteo, tu'ugyi møk xyik'ett yø mwinmaa'n̄, møk nabyikta'agi øy ja ayo'on yja'ity, nadyamiyoxi amumjoojt ja kajpxwa'kxin sa ja nitso'ok'ajtin nbaajint, tu'ugyi jade'en xyikyø'ty yø mdunk.

<sup>6</sup>Jøts øts, tøts øts jade'en nadyamiyøxyi ja Dios yja', jøts øts yjawi tsojk ja ol'kin nbaatt. <sup>7</sup>Møk ø tø nwindani ja Dios yja' jøts øts jade'en nyikjøpkøjxni ja ndunk ja nwinmaa'n̄. Tø øts ja njanchja'win jade'en nmi'ity. <sup>8</sup>Ja øy'ajtin øts xjøp'ejxp jøts øts ja nbaatt, ja'agøjxp ku øts ja Dios tø xkupiky. Jaanimts øts ja nyikmo'ot ku ja tiidyu'unin ka'pxy xukpaajint. Ni kidi øtsip ja nadyu'uk yikmo'op, niduki'iyi ja tpaattit pøn tjøp'ejx'ajttip jøts ja nwindson'ajtim mye'ent.

#### Ku ja Pablo ttukmadøy ja Timoteo sa tyu'unt

<sup>9</sup>Tun wan ja may'ajt jøts tsojk mme'ent jøts ø x'ext; <sup>10</sup>pø tøxi øts ja Demas xmajtstu'tuty, kyø'øm winmaa'n̄ ja yiktunwampy, jøts tø ñijkxy jam Tesalónikit kajpjotp. Jam øts ja Cresente tø nguexy Galaciit y'etjotp, jøts ja Tito tø ñijkxy jam Dalmacia y'etjotp. <sup>11</sup>Ja Lucas øts ixyam møøt njaak'ity. Ixa' jam ja Marcos jøts møøt mme'ent, jøts øts ja xpudøkit. <sup>12</sup>Nayide'ents ja Tíquico tø nguexy jam Efeso kajpjotp. <sup>13</sup>Ku mme'ent, xyikmejnip øts ja nnixox midi jam nyiktaan Carpo tyøjkjotp jam Troas; xja'myajtsip øts ja nlibri jøts øts ja nnøky xjadyimyikmejnint midi nyiktumpy.

<sup>14</sup>Tø øts xmidundigøy møj ja Alejandro midi ka'tsp; Dios

wyíngujkpts ja tkubatt pøni ti tø ttuñ. <sup>15</sup>Øyim mnay'ejx'etít møøt ja', jot'ambøjkp ja' ku ja Dios ja yja' yikajpxwá'kxi.

<sup>16</sup>Ku øts myíjawayeen nwinguwa'jkíyíí'ñ ja windsøndøjk ja kudunktøjk, nípøn ø xkabudøjkíyíí'ñ; xmajtstutkøjxnidi øts ja' nidukí'íyí. Øts wamp jøts ja Dios ja kyadabayø'øyídit. <sup>17</sup>Ja nwindson'ajtim øts xpudøjkíyíí'ñ jøts øts ja møk'ajtin xmøøy, jøts øts nyikyø'øy ja kajpxwá'kxin sa ja nitsø'ok'ajtin nbaajtint, jøts øts ndukmadøøy nidukí'íyí pøn ka'israelit jaa'dyi. Jade'ents øts ojts ja nwindson'ajtim xuu'mø'øy mā jaty øts n'ayo'ombaaty.

<sup>18</sup>Xyiknitso'ok'ajtip øts ja nayide'en ja n'anmíja'win jøts øts ngapaatt ja ka'øybi jøts ø xpøkjø'økt jap tsajpjøtpy mā ja y'ity. iKunuu'kxy'ejtpim ja Dios

xemikøjxp! Jade'en idø'øn ja y'ejxi tyiyi.

**Ku ja Pablo kyajpxpøø'kxy jøts ja kunuu'kxin t'ukyajkni**

<sup>19</sup>Kajpxpoo'kx jam ja Prisca møøt ja Aquila, jøts nayide'en ja Onesíforo ja myígu'uktøjk. <sup>20</sup>Tø øts ja Erasto nyiktañ jam Corinto, tø ja Trófimo pyá'ambety jam Mileto kajpjotp, paty øts jam tø nyiktañ. <sup>21</sup>Tsojk mme'ent ka'aním ja xuxpyoj tpaaty. Møj ja kajpxpoo'kxin mdaníguexyi ja Eubulo møøt ja Pudente. Nayide'ents ja kajpxpoo'kxin mdaníguexyi ja Lino, jøts ja Claudia, møøt nidukí'íyí adøm nmígu'uk janchja'wíbidí.

<sup>22</sup>Møøt ja nwindson'ajtim Jesucristo m'ett, jøts nidukí'íyí ja Dios mgunuu'kxidit. Jade'en idø'øn ja yjatt.